



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

არისტოტელიზმი

არისტოტელიზმი, არისტოტელეს ფილოსოფიის ძირითადი პრინციპების ამა თუ იმ სახით აღიარება და გაზიარება. ა. ფილოსოფიის და საერთოდ კულტ. ისტ. არსებითი ასპექტია. არისტოტელეს გავლენა განიცადა პერიპატეტიკოსთა სკოლამ, არაბულმა ფილოსოფიამ. აღმოსავლეთის სქოლასტიკაში ა. ნეოპლატონიზმსა და არეოპაგეტიკასთან ერთად გავრცელდა, დასავლეთში კი ერთპიროვნულად გაბატონდა XIII ს-იდან.

საქართველოში ა-ის გავლენა IV ს-იდან დასტურდება (კოლხეთის უმაღლესი რიტორიკული სკოლა), უმაღლეს წერტილს აღწევს XI-XII სს-ში. არსენ იყალთოელი არისტოტელიკოსია, მთავარ ყურადღებას არისტოტელეს ლოგიკურ შრომებს აქცევს, როგორც თეოლოგიისათვის გამოსადეგს (ლოლაშვილი ი., არსენ იყალთოელი, 1978). ხოლო იოანე პეტრინი გვთავაზობს ნეოპლატონურად გაგებული პლატონისა და არისტოტელეს მოძღვრებათა სინთეზის საინტერესო ვარიანტს: არისტოტელეს მიერ ამქვეყნიური სინამდვილის კვლევა სანიმუშოა, აუცილებელია მისი სილოგისტიკაც, მაგრამ უარსაყოფია ის, რაც მასში პლატონის მოძღვრებას უპირისპირდება. უფრო მკაცრია პეტრინი არისტოტელეს კომენტატორების, კერძოდ ალექსანდრე აფროდისიელისა და სხვათა მიმართ. ამავე პერიოდში საქართველოში ითარგმნება არისტოტელესა და მისი კომენტატორების შრომები. არისტოტელეს მოძღვრების გავლენა საერო პოეზიაშიც აისახება (მაგ., ჩახრუხაძე „თამარიანში“, პეტრინისაგან განსხვავებით, სიბრძნის მწვერვალად არისტოტელეს მიიჩნევს და არა პლატონს). არისტოტელეს პეტრინისეული შეფასება ჩანს ს.-ს. ორბელიანის ლექსიკონში და ანტონ კათალიკოსთან, თუმცა იგი მეცნ. ახ. მიღწევების საფუძველზე არისტოტელეს აკრიტიკებს კიდევ. ს. დოდაშვილი თავისი ფილოს. კურსის პირველ ნაწილში („ლოგიკა“) ლოგიკის ისტ. საკუთარ კონცეფციაში საინტერესოდ აანალიზებს არისტოტელესა და ა-ის წვლილს ლოგიკის განვითარებაში. შ. ნუცუბიძე ნაშრომში – „ბოლცანო და მეცნიერების თეორია“ (1913) ქმნის არისტოტელეს

მოდღვრების შეფასების საკუთარ კონცეფციას, რ-საც თანდათან ავითარებს შემდეგ წლებში. თანამედროვე დონეზე არისტოტელეს კრიტ. ათვისების ნიმუშია ს. დანელიას ნარკვევი - „არისტოტელე როგორც ფილოსოფიის ისტორიკოსი“ (1923), რ-ის რიგი დებულებები მოგვიანებით იქნა წამოწეული დასავლეთის ფილოს. ისტ. კვლევაში. კონცეპტუალური თვალსაზრისით არისტოტელეს მოძღვრების ანალიზისათვის ნაყოფიერი დებულებები შექმნეს მ. გოგიბერიძემ და ს. წერეთელმა. არისტოტელეს და ა-ის სხვადასხვა ასპექტს საქართველოში იკვლევენ შ. ხიდაშელი, ზ. მიქელაძე, მ. ჭელიძე, თ. კუკავა, თ. დოლოძე და სხვ.

ლიტ.: ბ ა ქ რ ა ძ ე კ., ახალი ფილოსოფიის ისტორია, თბ., 1969; გ ო გ ი ბ ე რ ი ძ ე მ., ფილოსოფიის ისტორია, ტ. 1, თბ., 1941; ნ უ ც უ ბ ი ძ ე შ., ქართული ფილოსოფიის ისტორია, ტ. 1 - 2, თბ., 1956-58; ჭ ე ლ ი ძ ე მ., ფილოსოფიის ისტორიის მეცნიერების სათავეებთან (პლატონი, არისტოტელე), თბ., 1982; З у б о в В. П., Аристотель, М., 1963.

გ. თევზაძე
